

25. september 2019

UKA2019/144/91

**Uunga siunnersuut: Utoqqalinersiaqarneq pillugu Inatsisartut inatsisaata allanngortinnissaa pillugu Inatsisartut inatsisaat nr. xx, xx. xxx 2019-imeersoq(Utoqqalinersianik ikilisitsisoqartinnagu aningaasanik innuttaasup akissarsiarisinnaasaanik qaffaaneq).**

(Peqqissutsimut, Isumaginninnermut Inatsisinillu Atuutsitsinermut Naalakkersuisoq)

**Utoqqalinermi siusinaartumillu pensionisiat allanik isertitaqarnerit nassatarisaannik annikillineqartarunnaarnissaasa kinguneqaataannik pillugit Naalakkersuisut kingusinnerpaamik UPA2021-mi nassuiaammik saqqummiussinissaannik peqquneqarnissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Siverth K. Heilmann, Atassut)

Utoqqalinersiaqarneq pillugu Inatsisartut inatsisaata allanngortinnissaa pillugu Naalakkersuisut saqqummiussaata qilanaaralugu tikilluaqqarput.

Eqqaamaneqassaaq Inatsisartunut kingullermik qineqqusaarnermi Siumumiit saqqummiukkatsigu Utoqqaat utoqqalinersiutiminnik ilanngaaffigineqaratik sulinerimikkut isertitaqarsinnaanerit pitsanngorsaavigineqassasoq, aammalu siumumiit pinngaatikkippit utoqqaat tamarmik naligiimmik utoqqalinersiuteqarnissamut periarfissaqarnissaat.

Soorunami paasilluarsinnaavarput utoqqalinersiaqarnikkut aqqissuussineq aningaasarpassuarnik atuiffiusarmat, aammalu nunatta aningaasatigut qanoq inissisimanera aallaavigalugu pitsanngosaataasinnaasunik aqqiisarnissaq pisariqarluni.

Siumumiit pingaartilluinnarparput Nunatsinni innuttaasut inuiaqatigiinni suleqataareerlutik utoqqalinerminni toqqissisimanartumik ajunngitsumik atugaqartarnissaat, aammalu piumagunik peqqikkunillu suliffeqaannarnissamut periarfissaqarnissaat innummut kimulluunniit nuannersuussaaq, inuiaqatigiinni pisariqartinneqarluni misigalugu.

Taamaammatt Siumumiit iluarisimaarparput maannakkut utoqqalinersiaqarnikkut aqqiissutissaq, tassa utoqqalisut peqqissut aningaasarsiaqarnerit akunnattumillu isertitalit suliffeqaannaraluarlutik saniatigut utoqqalinersiaqartarnissamut periarfissaqalissammata. Taamaaliornikkut Nunatsinni sulisussaqaarnikkut ajornartorsiorfitsinni aamma utoqqalisut peqqissut inuiaqatigiinni oqilisaasseqataannissamut periarfissaqassammata.

Siumumiillu maluginiarparput aappariit aappaannaa utoqqalinersiuteqarsinnaatillugu aappariit ukiumut isertitaasa 300.000 kr. Ataasimappatigit, taava taanna aappaasoq kisimiittutut utoqqalinersiallit angeqataanik utoqqalinersiaqarsinnaalissaaq. Tamatut alloriarneq siumumiit iluarisimaarparput, neriussaagullu nunatta aningaasatigut periarfissai pitsanngoriartortillugit aamma utoqqalinersiaqarnikkut siusinaartumillu pensioneqaarnikkut pitsanngorsaasoqartarumaartoq.

Siumumiit isumaqarpugut maannakkut pitsaanerulersitsinissamut periarfissat tamaarmik misissoqquissaarneqartariaqartut, inatsisissatut siunnersuutip naammassillugu suliarinnginnerani.

Siumumiimmi isumaqartuaratta, nunarput aningaasatigut periarfissaqartillugu aamma utoqqartatta malugisinnaasariaqaraat aamma atukkamikkkut pitsanngoriaataasunik.

Taamannak oqaaseqarluta Utoqqalinersiaqarnej pillugu Inatsisartut inatsisaata allannguutissaatut siunnersuut Imm. 144 Isumaginninnermut peqqinnissamullu ataatsimiititaliamit aammalu aningaasaqarnermut akileraartarnermullu ataatsimiititaliamit ataatsimoorullugu suliarineqarnissaa kaammattuutigaarput, taamaaliornikkut suli pitsanngoriaataasinnaasut qulaajarluarnreqarnissaat pisinnaassammat siunnersuutip aappassaaneerlugu Inatsisartunit suliarineqannginnerani.'

Siunnersuummut Imm. 91-imut Siverth K. Heilmann-imit Atassummiit siunnersuutigineqartumut Siumumiit oqaatigissuarput taamatut utoqqaliner mi siusinaartumillu pensionit pillugit nassuiaasaqattaarnerit naammareermata aammalu qanoq iliuuseqarnissaq pingaarnerummat siunnersuut Siumumiit itigartippaarput.

Taamannak oqaaseqarluta, inatsisartut ataatsimiititaliallu sulilluarnissaannik kissaappavut.

Hermann Berthelsen, Siumut